

四庫全書

集部

欽定四庫全書

集部

漢魏六朝百三家集卷二十四
五

詳校官庶吉士_臣謝恭銘

主事銜_臣徐以坤覆勘

總校官檢討_臣何思鈞

校對官編修_臣嚴福

謄錄監生_臣王明

欽定四庫全書

漢魏六朝百三家集卷二十四

魏文帝集題詞

曹子桓生長戎旅之間善騎馬左右射又工擊
劒彈碁伎能戲弄不減若父其詩歌文辭彷彿
上下即不堪第畜陳思為孟德大兒固有餘也
魏王帝業無足稱惟令宦人為官不得過諸署
令詔羣臣家不得奏事大皇后族家不得當輔

政任石室金策可寶萬世彼親見漢室炎隆女
主中人手撲滅之麥秀黍離恫傷心目霸朝初
創力更舊轍至待山陽公以不死禮遇漢老
臣揚彪不奪其志盛德之事非孟德可及當日
符命獻諛璽綬被躬羣衆推奉時與勢迫倘建
安君臣有能為武庚比干者或觀望却步竟保
常節未可知也典論自序善述生平論文一篇
直自言所得與王朗書務立不朽於著述間不

肯以七尺一棺畢其生死雅慕漢文沒而得諡
良云厚幸占其志趣亦古諸侯之博聞者也甄
后塘上陳王豆歌損德非一崇華首陽有餘恨
焉

目錄

賦

浮淮賦 有序

滄海賦

濟川賦

臨渦賦

有序

述征賦

校獵賦

又

又

登臺賦

有序

登城賦

感物賦有序

感離賦有序

離居賦

戒盈賦有序

永思賦

悼天賦有序

寡婦賦有序

出婦賦

愁霖賦

喜霽賦

彈棊賦

又

瑪瑙勒賦

有序

車渠椀賦

有序

迷迭賦

有序

玉玦賦

柳賦

有序

槐賦

有序

鶯賦

有序

迷迭香賦

有序

蔡伯喈女賦

有序
賦闕

詔

定正朔詔

追崇孔子詔

為漢帝置守塚詔

息兵詔

災異免策三公詔

拜日東郊詔

禁母后預政詔

改封諸王為縣王詔

鵜鵠集靈芝池詔

取士不限年詔

輕刑詔

平准詔

禁復讐詔

禁淫祀詔

罷墓祭詔

外國遣使奉獻詔

營壽陵詔

與羣臣詔

四首

下潁川詔

增封中牟侯彰詔

答臨淄侯植詔

答北海王象詔

待揚彪客禮詔

賜華歆詔

論孫權詔

以陳羣為鎮軍司馬懿為撫軍詔

王朗等三公詔

與王朗詔

報王朗詔

答蔣濟詔

與夏侯尚詔

報何夔詔

與于禁詔

于禁復官詔

追贈夏侯尚詔

封朱靈歆侯詔

與張郃詔

答孟達詔

手報司馬芝詔

封張遼李典子為關內侯詔

以李通子基為中郎將詔

賜張既子翕歸為關內侯詔

賜溫恢子生爵關內侯詔

以張登為大官令詔

制詔三公

服色如奏詔

改雒為洛詔

曹植貶封安鄉侯詔

誅鮑勛詔

復以蔣濟為東中郎將詔

賜桓階詔

劉靖遷廬江太守詔

張既為涼州詔

與張既詔

褒田豫詔

追諡杜畿詔

與羣臣詔

又

詔司馬懿

令

向化手令

答許芝上代漢圖讖令

答辛毗等令

答司馬懿等令

答劉廙劉曄等令

讓禪令

讓禪第二令

讓禪第三令

答劉廙等令

答蘇林等令

答華歆等令

又答相國歆等令

薄稅令

復樵租稅令

以鄭稱為武德傳令

廣詢令

問雍州刺史張既令

拜毛玠等子男為郎中令

收斂戰亡士卒令

策

追封鄧公策

謚龐德策

策孫權九錫文

以孫登為東中郎封侯策

教

答卞蘭教

表

讓禪表

讓禪第二表

讓禪第三表

書

與吳質書

又

又

與鍾繇謝玉玦書

與鍾繇五熟釜

與鍾繇書

答鍾繇書

答繁欽書

啁劉楨書

答友人書

與吳監書

與羣臣論蜀錦書

與羣臣論被服書

與朝臣論杭稻書

報崔琰書

與曹洪書

與王朗書

五首

與劉曄書

與諸將書

報吳王孫權書

四首

與孟達書

二首

答曹洪書

戒鄢陵侯彰書

答楊修書

送劔書

說諸物

序

典論自序

繁欽集序

陳琳集序

建安諸序

論

典論論文

典論論方術

周成漢昭論

漢文帝論

漢武帝論

交友論

議

田疇辭封議

連珠

連珠

三首

銘

露陌刀銘

賜鍾繇五熟釜銘

文

即位告天文

哀策文

武帝哀策文

誄

弟蒼舒誄

制

終制

漢魏六朝百三家集卷二十四目錄

欽定四庫全書

漢魏六朝百三家集卷二十四

明 張溥 輯

魏文帝集

賦

浮淮賦 有序

建安十四年王師自譙東征大興水軍汎舟萬艘時予
從行始入淮口行泊東山覩師徒觀旌帆赫哉盛矣雖

孝武盛唐之狩舳艫千里殆不過也乃作斯賦云

沂淮水而南邁兮汎洪濤之湟波仰崑岡之崇阻兮經
東山之曲阿浮飛舟之萬艘兮建干將之鉅戈揚雲旗
之繽紛兮聆榜人之譟譟乃撞金鐘爰伐雷鼓白旄冲
天黃鉞扈扈武將奮發驍騎赫怒於是驚風汎涌波駭
衆帆張羣櫂起爭先逐進莫適相待

滄海賦

美百川之獨宗壯滄海之威神經扶桑而遐逝跨天涯

而託身驚濤暴駭騰叩澎湃鏗旬隱潏涌沸凌邁於是
鼉鼉漸離汎濫淫遊鴻驚孔鵠哀鳴相求揚鱗濯翼載
沉載浮仰喙芳芝俛漱清流巨魚橫奔厥勢吞舟爾乃
釣大貝採明珠寒懸黎收武夫窺大麓之潛林覩瑤木
之羅生上蹇產以交錯下來風之泠泠振綠葉以葳蕤
吐芬葩而揚榮

濟川賦

臨濟川之層淮覽洪波之容裔淖騰揚以相薄激長風

而亟逝漫浩汗而難測眇不覩其垠際於是龜龍神嬉
鴻鸞羣翔鱗介霍驛載止載行俯啞菁藻仰餐芳永
號長吟延首相望美玉昭晰以曜暉明珠灼灼而流光
於是遊覽既厭日亦西傾朱旗電曜擊鼓雷鳴長驅風
厲悠爾北征思魏都以偃息託華屋而遨遊酌玄清于
金罍騰羽觴以獻酬

臨渦賦

建安八年至譙余兄弟從上拜墳墓遂乘馬遊觀經東

園遵渦水相侔乎高樹之下駐馬書鞭作臨渦之賦曰
蔭高樹兮臨曲阿微風起兮水增波魚頤頤兮鳥逶迤
雌雄鳴兮聲相和萍藻生兮散莖柯春木繁兮發丹華

述征賦

建安十三年荆楚傲而弗臣命元司以簡旅予願奮武
乎南鄴伐靈鼓之朙隱兮建長旗之飄颻躍甲卒之皓
旰兮馳萬騎之瀏瀏揚凱悌之豐惠兮仰乾威之靈武
伊皇衢之遐通兮維天網之畢舉經南野之舊都聊弭

節而容與遵往初之舊迹順歸風以長邁鎮江漢之遺
民靜南畿之遐裔

校獵賦

披高門而方軌邁夷途而直駕長鋌紉電飛旗拂天部
曲按列什伍相連峙如叢林動若奔山超崇岸之曾崖
厲障澁之雙川列翠星陳戎車方轂風迴雲轉埃連颺
屬雷響震天地譟聲蕩山岳躡躡封豨籍塵鹿捎飛鳥
接鸞驚聚者成丘陵散者填溪谷流血赫其丹堊羽毛

紛其翳目考功効績班賜有敘分授甘魚飛酌清醑割
鮮苴享舉爵鳴鼓鑾輿促節騁轡迴翔望雀臺而增舉
涉幽澗之花梁

又

挹冲天之素旄兮靡格澤之修旃雄戟趙音而躍厲兮
黃鉞扈而楊鮮

又

千乘亂擾萬騎奔走經營原隰騰越峻岵彤弓斯殷戈

鉞具舉

登臺賦

建安十七年春遊西園登銅雀臺命余兄弟並作其詞
曰

登高臺以騁望好靈雀之麗嫺飛閣崛其特起層樓儼
以承天步逍遙以容與聊遊目於西山溪谷紆以交錯
草木鬱其相連風飄颻而吹衣鳥飛鳴而過前申躊躇
以周覽臨城隅之通川

登城賦

孟春之月惟歲權輿和風初暢有穆其舒駕言東道陟
彼城樓逍遙遠望乃欣以娛平原博敞中田闢除嘉麥
被壟緣路帶衢流莖散葉列倚相扶水幡幡其長流魚
裔裔而東馳風飄飆而既臻日掩夢而鹵移望舊館而
言旋永優游而無為

感物賦

喪亂以來天下城郭丘墟惟從太僕君宅尚在南征荆

州還過鄉里舍馬乃種諸蔗於中庭涉夏歷秋先盛後衰悟興廢之無常慨然永歎乃作斯賦

伊陽春之散節悟乾坤之交靈瞻玄雲之翳鬱仰沉陰之杳冥降甘雨之豐霈垂長溜之泠泠掘中堂而為圃植諸蔗於前庭涉炎夏而既盈迄凜秋而將衰豈在斯之獨然信人物其有之

感離賦

有序

建安十六年上西征余居守老母諸弟皆從不勝思慕

乃作賦曰

秋風動兮大氣涼居常不快兮中心傷出北園兮徬徨
望衆墓兮成行柯條惜兮無色綠草變兮萎黃感微霜
兮零落隨風雨兮飛揚日薄暮兮無悰思不衰兮愈多
招延佇兮良久忽踟躕兮忘家

離居賦

惟離居之可悲廓獨處於空牀愁耿耿而不寐歷冬夜
之悠長驚風厲於閨闥忽增激於中房動帷裳之掩曖

彼明燭之無光

戒盈賦 有序

避暑東閣延賓高會酒酣樂作悵然懷盈滿之戒乃作
斯賦

惟應龍之將舉飛雲降而下征資物類之相感信貫徹
之通靈何今日之延賓君子紛其集庭信臨高而增懼
獨處滿而懷愁願羣士之箴規博納我以良謀

永思賦

仰北辰而永思沂悲風以增傷哀遐路之漫漫痛長河之無梁願託乘於浮雲嗟逝速之難當

悼天賦

有序

族弟文仲亡時年十一母氏傷其夭逝追悼無已余以宗族之愛乃作斯賦

氣紆結以填胸不知涕之縱橫時徘徊於舊處覩靈衣之在床感遺物之如故痛爾身之獨亡愁端坐而無聊心慙慙而不寧步廣廈而踟躕覽萱草於中庭悲風蕭

其夜起秋氣懽以厲情仰瞻天而太息聞別鳥之哀鳴

寡婦賦

有序

陳留阮元瑜早亡每感存其遺孤未嘗不愴然傷心故作斯賦

惟生民兮艱危於孤寡兮常悲人皆處兮歡樂我獨怨
兮無依撫遺孤兮太息俛哀傷兮告誰三辰周兮遞照
寒暑運兮代臻厯夏日兮苦長涉秋夜兮漫漫後霜隕
兮集庭燕雀飛兮吾前去秋兮就冬改節兮時寒水凝

今成冰雪落兮翻翻傷薄命兮寡獨內惆悵兮自憐

出婦賦

念在昔之恩好似比翼之相親惟方今之疏絕若驚風
之吹塵夫色衰而愛絕信古今其有之傷甄獨之無恃
恨後嗣之不滋甘沒身而同穴終百年之常期信無子
而應出自典禮之常度悲谷風之不答怨昔人之忽故
被入門之初服出登車而就路遵長塗而南邁馬躊躇
而迴顧埜鳥銕而高飛愴哀鳴而相慕撫駢服而展節

即臨沂之舊城踐麋鹿之曲蹊聽百鳥之羣鳴情悵悵
而顧望心鬱結其不平

愁霖賦

脂余車而秣馬將言旋乎鄴都玄雲黯其四塞雨濛濛
而襲予塗漸洳以流滯潦淫衍而橫湍豈在余之憚勞
哀行旅之艱難仰皇天而太息悲白日之不暘思若木
以照路假龍燭之未光

喜霽賦

乃命駕而言歸啓吉日而北巡厭羣萌之至願感上下
之明神密雲興之袂北甘雨降以灑塵既灑塵而為塗
惟平路之未晞激清風以漂潦發皎日之陽暉振余策
而長驅忽臨食而忘飢

彈碁賦

惟彈碁之嘉巧邈超絕其無儔苞上智之弘略允貫微
而洞幽局則荆山妙璞發藻揚暉豐腹高隆庫根四頽
平如砥礪滑若柔荑碁則玄木北幹素樹西枝洪纖若

一修短無差象籌列植一據雙螭滑石霧散雲布四垂
然後直扣先縱二八次舉緣邊間造長斜迭取爾乃詳
觀夫變化之理屈伸之形聯翩霍繹展轉盤縈或暇豫
安存或窮困側傾或接黨連興或孤據偏停于時觀者
莫不虛心竦踊咸側席而延佇或雷抃以大喙或戰悸
而不能語

又

丈石為局金碧齊精隆中夷外理緻肌平

瑪瑙勒賦有序

瑪瑙玉屬也出自西域文理交錯有似馬腦故其方人因以名之或以繫頸或以飾勒余有斯勒美而賦之命陳琳王粲並作辭曰

有奇章之珍物寄中山之崇岡稟金德之靈施含白虎之華章扇朔方之玄氣喜南離之焱陽歛中區之黃采曜東夏之純蒼苞五色之明麗配皎日之流光命夫良工是剖是鑄追形逐好從宜索便乃加砥礪刻方為圓

沈光內灼浮景外鮮繁文縟藻文采接連嘉鏤錫之盛
美感戎馬之首飾固茲物之攸宜信君子之所服爾乃
藉彼朱罽華勒用成駢居列峙煥若羅星

北堂誤截數
語蒙作陳琳

今合藝文
御覽正之

車渠椀賦

有序

車渠玉屬也多纖理縟文生於西國其俗寶之
惟二儀之普育何萬物之殊形料珍怪之上美無茲椀
之獨靈苞華文之光麗發符采而揚榮理交錯以連屬

似將離而復并或若朝雲浮高山忽似飛鳥厲蒼天夫
其方者如矩圓者如規稠希不謬洪纖有宜

玉玦賦

有崑山之玦璞產曾城之峻岷嗽丹水之炎波陰瑤樹
之玄枝包黃中之純氣抱虛靜而無為應九惠之淑懿
體五材之表儀

柳賦有序

昔建安五年上與袁紹戰於官渡時余始植斯柳自彼

迄今十有五載矣感物傷懷乃作斯賦曰

伊中域之偉木兮現姿妙其可珍稟靈祇之篤施兮與
造化乎相因四時邁而代運兮去冬節而涉春彼庶卉
之未動兮固肇萌而先辰盛德遷而南移兮星鳥正而
司分應隆時而繁育兮揚翠葉之青純修幹偃蹇以虹
指兮柔條阿那而虵伸上扶疎而施散兮下交錯而龍
鱗在余年之二七植斯柳乎中庭始圍寸而高尺今連
拱而九成嗟日月之逝邁忽壘壘以遄征昔周遊而處

此今倏忽而弗形感遺物而懷故俛惆悵以傷情於是
曜靈次乎鷄首兮景風扇而增煖豐弘陰而博覆兮躬
愷悌而弗倦駟馬望而傾蓋兮行旅仰而迴睠秉至德
而不伐兮豈簡卑而擇賤舍精靈而寄生兮保休體之
豐衍惟尺斲而能植兮信永貞而可羨

槐賦有序

文昌殿中槐樹盛暑之時余數遊其下美而賦之王粲
直登賢門小閣外亦有槐樹乃就使賦曰

有大邦之美樹惟令質之可嘉托靈根於豐壤被日月之光華周長廊而開趾夾通門而駢羅承文昌之邃宇望迎風之曲阿修幹紛其璀璨綠葉萋而重陰上幽藹而雲覆下莖立而擢心伊暮春之既替即首夏之初期鴻鴈遊而送節凱風翔而迎時天清和而溫潤氣恬淡以安治違隆暑而適體誰謂此之不怡

鶯賦有序

堂前有籠鶯晨夜哀鳴悽若有懷憐而賦之曰

怨羅人之我困痛密網而在身顧窮悲而無告知時命
之將泯升華堂而進御奉明后之威神唯今日之僥倖
得去死而就生託幽籠以栖息厲清風而哀鳴

迷迭香賦

有序

余種迷迭于中庭嘉其揚條吐香馥有令芳乃為之賦
曰

生中堂以遊觀兮覽芳艸之樹庭重妙葉於纖枝兮揚
修榦而結莖承靈露以潤根兮嘉日月而敷榮隨迴風

以搖動兮吐芬氣之穆清薄西夷之穢俗兮越萬里而
來征豈衆卉之足方兮信希世而特生

蔡伯喈女賦序

家公與蔡伯喈有管鮑之好乃命使者周近持玄璧于
匈奴贖其女還以妻屯田郎都命使者

詔

定正朔詔

孔子稱行夏之時乘殷之輅服周之冕樂則韶舞此聖

人集羣代之美事為後王制法也傳曰夏數為得天朕
承唐虞之美至於正朔當依虞夏故事若殊徽號異器
械制禮樂易服色用牲幣自當隨上德之數每四時之
季月服五十八日臘以丑牲用帛其飾節旄自當赤但
節幡黃耳其餘郊祀天地朝會四時之服宜如漢制宗
廟所服一如周禮

追崇孔子詔

昔仲尼資大聖之才懷帝王之器當衰周之末無受命

之運在魯衛之朝教化乎洙泗之上悽悽焉遑遑焉欲
屈已以存道貶身以救世於時王公終莫能用之乃退
考五代之禮修素王之事因魯史而制春秋就太師而
正雅頌俾千載之後莫不宗其文以述作仰其聖以成
謀咨可謂命世之大聖億載之師表者也遭天下大亂
百祀墮壞舊居之廟毀而不修褒成之後絕而莫繼闕
里不聞講頌之聲四時不覩蒸嘗之位斯宣所謂崇禮
報功盛德百世必祀者哉其以議郎孔羨為宗聖侯邑

百戶奉孔子祀令魯郡修起舊廟置百戶吏卒以守衛之又於其外廣為屋室以居學者

為漢帝置守塚詔

朕承符運受終革命其敬事山陽公如舜之宗堯有始有卒傳之無窮前羣司奏處正朔欲使一皆從魏制意所不安其令山陽公於其國中正朔服色祭祀禮樂自如漢典又為武昭宣明帝置守塚各三百家

息兵詔

孫權殘害民物朕以寇不可長故分命猛將三道並征
今征東諸軍與權黨呂範等水戰則斬首四萬獲船萬
艘大司馬據守濡須其所禽獲亦以萬數中軍征南攻
圍江陵左將軍張郃等舳艫直渡擊其南渚賊赴水溺
死者數千人又為地道攻城城中外雀鼠不得出入此
凡上肉耳而賊中癘氣疾病夾江塗地恐相染汚昔周
武伐殷旋師孟津漢祖征隗囂還軍高平皆知天時而
度賊情也且成湯解三面之網天下歸仁今開江陵之

圍以綏成死之禽且休力役罷省繇戍畜養士民咸使
安息

災異免策三公詔

災異之作以譴元首而歸過股肱豈禹湯臯己之義乎
其令百官各虔厥職後有天地之眚勿復劾三公

拜日東郊詔

漢氏不拜日於東郊而旦夕常於殿下東面拜日煩褻
似家人之事非事天郊神之道也

禁母后預政詔

夫婦人與政亂之本也自今以後羣臣不得奏事太后后族之家不得當輔政之任又不得橫受茅土之爵以此詔傳後世若有背違天下共誅之

改封諸王為縣王詔

先王建國隨時而制漢祖增秦所置郡至光武以天下損耗并省郡縣以今比之益不及焉其改封諸王皆為縣王

鵜鵠集靈芝池詔

此詩人所謂汙澤也曹詩刺恭公遠君子而近小人今
豈有賢智之士處於下位者乎否則斯鳥何為而至其
博舉天下雋德茂才獨行君子以答曹人之刺

取士不限年詔

今之計考古之貢士也十室之邑必有忠信若限年然
後取士是呂尚周晉不顯於前世也其令郡國所選勿
拘老幼儒通經術吏達文法到皆試用有司糾故不以

實者

輕刑詔

近之不綏何遠之懷今事多而民少上下相弊以文法
百姓無所措其手足昔太山之哭者以為苛政甚於猛
虎吾備儒者之風服聖人之遺教宣可以目翫其辭行
違其誠者哉廣議輕刑以惠百姓

平准詔

今與孫驃騎和通商旅當日月而至而百賈偷利喜賤

其物平價又與其絹故官逆為平准耳宜宜少此物輩
耶

禁復讎詔

喪亂以來兵革縱橫天下之人多相殘害者昔田橫殺
酈商之兄張步害伏湛之子漢氏二祖下詔使不得相
讎今兵戎始息宇內初定民之存者非流亡之孤則鋒
刃之餘當相親愛養老長幼自今以後宿有讎怨者皆
不得相讎

禁淫祀詔

先王制禮所以昭孝事祖大則郊社其次宗廟三辰五行名山大川非此族也不在祀典叔世衰亂崇信巫史至乃宮殿之內戶牖之間無不沃醑甚矣其惑也自今其敢設非祀之祭巫祝之言皆以執左道論著於令典

罷墓祭詔

先帝躬履節儉遺詔省約子以述父為孝臣以繫事為忠古不墓祭皆設於廟高陵上殿屋皆毀壞車馬還廄

衣服藏府以從先帝儉德之志

外國遣使奉獻詔

西戎即敘氐羌來王詩書美之項者西域並款塞內附
其遣使者撫勞之

與羣臣詔

南方龍眼荔枝寧比西國蒲萄石蜜乎酢且不如中國
凡棗味莫若安邑御棗也

又

真定郡黎大若拳甘若蜜脆若凌可以解煩釋渴

又

前于闐王山習所上孔雀尾萬枚文彩五色以為金根車蓋遙望曜人眼

又

新城孟太守道蜀肥羊雞鶩味皆淡故蜀人作食喜着飴蜜

下潁川詔

賴川先帝所由起兵征伐也官渡之役四方瓦解遠近
顧望而此郡守義丁壯荷戈老弱負糧昔漢祖以秦中
為國本光武恃河內為王基今朕復於此登壇受禪天
以此郡翼成大魏

增封中牟侯彰詔

先王之道庸勲親親並建母弟開國承家故能藩屏大
宗禦侮厭難彰前受命北伐清定朔土厥功茂焉增邑
五千并前萬戶

答臨淄侯植詔

植未欲祭先王操於北河之上博士鹿優韓
益等以為禮公子不得稱先君公子之子不
得祖諸侯謂不得立廟而祭也禮又
曰庶子不得祭宗廟遂詔答之

得月二十八日表知侯推情欲祭先王於河上覽省上
下悲傷感切將欲遣禮以紓侯敬恭之意會博士鹿優
等奏禮如此故寫以示開國承家顧迫禮制惟侯存心
與吾同之

答北海王褒詔

黃初三年黃龍見鄴西漳水袞
上書贊誦賜黃金十斤詔答

昔唐叔歸禾東平獻頌斯皆骨肉贊美以彰懿親王研
精墳典耽味道真文雅煥炳朕甚嘉之王其克慎明德
以終令問

待楊彪客禮詔

夫先王制几杖之賜所以賓禮黃耆褒崇元老也昔孔
光卓茂皆以淑德高年受茲嘉賜公故漢宰臣乃祖已
來世著名節年過七十行不踰矩可謂老成人矣所宜

寵異以章舊德其賜公延年杖及馮几謁請之日便使杖入又可使著鹿皮冠

賜華歆詔

司徒國之雋老所與和陰陽理庶事也今大官重膳而司徒蔬食甚無謂也特賜御衣及為其妻子男女皆作衣服

論孫權詔

權前對浩周自陳不敢自遠樂委質長為外臣又前後

辭旨頭尾擊地此鼠子自知不能保爾許地也又今與周書請以十二月遣子復欲遣孫長緒張子布隨子俱來彼二人皆權股肱心腹也又欲為子於京師求婦此權無異心之明效也

以陳羣為鎮軍司馬懿為撫軍詔

昔軒轅建四面之號周武稱予有亂臣十人斯蓋先聖所以體國君民亮成天工多賢為貴也今內有公卿以鎮京師外設牧伯以監四方至於元戎出征則軍中宜

有柱石之賢帥輜重所在又宜有鎮守之重臣然後車
駕可以周行天下無內外之慮吾今當征賊欲守之積
年其以尚書令潁鄉侯陳羣為鎮軍大將軍尚書僕射
西鄉侯司馬懿為撫軍大將軍若吾臨江授諸將方略
則撫軍當留許昌督後諸軍錄後臺文書事鎮軍隨車
駕當董督衆軍錄行尚書事皆假節鼓吹給中軍兵騎
六百人吾欲去江數里築宮室往來其中見賊可擊之
形使出奇兵擊之若或未可則當舒六軍以遊獵饗賜

軍士

詔王朗等三公

孫權欲遣子登入侍不至是時車駕徙許昌
大興屯田欲舉軍東征朗上疏諫帝以成軍
遂行臨江而還
詔王朗等三公

三世為將道家所忌窮兵黷武古有成戒況連年水旱
士民損耗而功作倍於前勞役兼於昔進不滅賊退不
和民夫屋漏在上知之在下然迷而知反失道不遠過
而能改謂之不過今將休息棲備高山沈權九淵割除

擯棄投之畫外車駕當以今月中旬到譙淮漢衆軍亦各還反不臘西歸矣

與王朗詔

黃初中詔公卿舉獨行君子朗薦光祿大夫楊彪且稱疾讓位於彪帝乃為彪置吏卒位

次三公詔

朗朗乃起

朕求賢於君而未得君乃翻然稱疾非徒不得賢更開失賢之路增玉鉉之傾無乃居其室出其言不善見違於君子乎君其勿有後辭

報王朗詔

明為司空帝頗出游獵或
昏夜還宮朗上疏帝報之

覽表雖魏絳稱虞箴以諷晉悼相如陳猛獸以戒漢武
未足以喻方今二寇未殄將帥遠征故時入原野以習
戎備至於夜還之戒已詔有司施行

答蔣濟詔

文帝即王位轉濟為相國長史及
踐阼出為東中朗將濟請留詔曰

高祖歌曰安得猛士守四方天下未寧要須良臣以鎮

邊境如其無事乃還鳴玉未為後也

與夏侯尚詔

文帝詔尚尚以示散騎常侍蔣濟濟言於帝
曰作威作福書之明誠天子無戲言古人所
慎於足追
收前詔

卿腹心重將特當任使恩施足死惠愛可懷作威作福
殺人活人

報何夔詔

蓋禮賢親舊帝王之常務也以親則君有輔弼之勲焉

以賢則君有醇固之茂焉夫有陰德者必有陽報今君疾雖未瘳神明聽之矣君其即安以順朕意

與于禁詔

昔漢高脫衣以衣韓信光武解綬以帶李忠誠皆人主當時貴敬功勞今以遠遊冠與將軍

于禁復官詔

昔荀林父敗績於邲孟明喪師於殽秦晉不替使復其位其後晉獲狄土秦霸西戎區區小國猶尚若斯而況

萬乘乎樊城之敗水災暴至非戰之咎其復禁等官

追贈夏侯尚詔

尚自少侍從盡誠竭節雖云異姓其猶骨肉是以入為腹心出當爪牙智略深敏謀謨過人不幸早殞命也奈何贈征南大將軍昌陵侯印綬

封朱靈郤侯詔

將軍佐命先帝典兵歷年威過方邵功踰絳灌圖籍所美何以加焉朕受天命帝有海內元功之將社稷之臣

皆朕所與同福同慶傳之無窮者也今封郇侯富貴不歸故鄉如夜行衣繡若平常所志願勿難言

與張郃詔

郃雖武將而愛樂儒士嘗薦同鄉
卑湛明經行修詔以湛為博士

昔祭遵為將奏置五經大夫居軍中與諸生雅歌投壺
今將軍外勒戎旅內存國朝朕喜將軍之意今擢湛為
博士

答孟達詔

王雄為西部從事與達同僚及為涿郡太守達表薦之詔報達雄後歷幽州刺史

昔蕭何薦韓信鄧禹進吳漢惟賢知賢也雄有膽智技能文武之姿吾宿知之今便以叅散騎之選方使少在吾門下知指歸便大用之矣天下之士欲使皆先歷散騎然後出據州郡是吾本意也

手報司馬芝詔

芝為河南尹曹洪乳母與臨汾公主侍者共祀無涸神繫獄卞太后遣黃門傳令芝不通軌初洛陽獄考竟芝上疏謝罪帝報之

省表明卿至心欲奉詔書以權行事是也此乃卿奉詔之意何謝之有後黃門復往慎勿通也

封張遼李典子為關內侯詔

合肥之役遼典以步卒八百破賊十萬自古用兵未之有也使賊至今奪氣可謂國之爪牙矣其分遼典邑各百戶賜一子爵關內侯

以李通子基為中郎將詔

昔袁紹之難自許蔡以南人懷異心通秉義不顧使搗

貳率服朕甚嘉之不幸早薨子基雖已襲爵未足酬其庸勲基兄緒前屯樊城又有功世篤其勞其以基為奉義中郎將緒平虜中郎將以寵異焉

賜張既子翁歸為關內侯詔

昔荀桓子立勲翟士晉侯賞以千室之邑馮異輸力漢朝光武封其二子故涼州刺史張既能容民畜衆使羣羌歸土可謂國之良臣不幸薨隕朕甚愍之其賜小子翁歸爵關內侯

賜溫恢子生爵關內侯詔

恢有柱石之質服事先帝功勤明著及為朕執事忠於
王室故授之以萬里之任任之以一方之事如何不遂
吾甚愍之賜恢子生爵關內侯

以張登為大官令詔

登忠義彰著在職功勤名位既卑直亮宜顯饗膳近在
當得此吏今以登為大官令

制詔三公

下並元年

上古之始有君也必崇恩化以美風俗然百姓順教而刑辟厝焉今朕承帝王之緒其以延康元年為黃初元年議改正朔易服色殊徽號同律度量承土行大赦天下自殊死以下諸不當得赦皆赦除之

服色如秦詔

服色如所奏其餘宜如虞承唐但臘日用丑耳此亦聖人之制也

改雒為洛詔

火行也火忌水故洛去水而加佳魏於行次為土土水之牡也水得土而乃流土得水而柔故除佳加水變雉為洛

曹植貶封安鄉侯詔

黃初二年監國謁者灌均希旨奏植醉酒悖慢劫脅

使者有司請治罪帝以太后故貶爵安鄉侯

植朕之同母弟朕於天下無所不容而況植乎骨肉之親舍而不誅其改封植

誅鮑勛詔

勛為治書執法帝從壽春還屯陳留郡界太守孫邕邪行不從正道軍營

今史劉曜欲推之勛以壘壘未成解止曜有罪勛奏一遣而曜密表勛私解鬯事詔曰

勛指鹿作馬收付廷尉

蔣濟復為東中郎將詔

卿兼資文武志節忼慨常有超越江湖吞吳會之志故復授將率之任

賜桓階詔

桓階別傳階為趙郡太守時俸盡食醬踣上聞數戲曰卿家作醬頗多成

否詔

曰

昔子文清儉朝不謀夕而有脯糧之秩宣子守約軍食

魚殮而有加梁之賜豈況光光大魏富有四海棟宇大
臣而有蔬食非吾所以禮賢之意也其賜射鹿師二人

并給媒弩

字一作梁

劉靖遷廬江太守詔

卿父昔為彼州今卿復據此郡可謂克負荷者也

張既為涼州詔

昔賈復請擊郾賊光武笑曰執金吾擊郾吾復何憂卿
謀略過人今則其時以便宜從事勿復先請

與張既詔

卿踰河歷險以勞擊逸以寡勝衆功過南仲勤踰吉甫此勲非但破胡乃永寧河右使吾長無西顧之念矣

褒田豫詔

魏略豫為邠州刺史鮮卑素利等感懷密遺金三十斤豫張袖受之及去

悉皆付外
詔褒之

昔魏絳開懷以納戎賂今卿舉袖以受狄金朕甚嘉焉

追諡杜畿詔

昔冥勤其官而水死稷勤百穀而山死故尚書僕射杜

畿於孟津試船遂至覆沒忠之至也朕甚愍焉追贈大僕諡曰戴侯

與羣臣

新城孟太守道蜀肫羊雞鶩味甘淡故蜀人作食喜著飴蜜

又

蓋聞千鍾百觚堯舜之飲也惟酒無量仲尼之能也姬旦酒殽不徹故能制禮作樂漢高婆娑巨醉故能斬蛇

鞠旅

詔司馬懿

文帝以懿為撫軍大將軍車駕自廣陵還洛陽詔懿於是帝留鎮許昌

吾東撫軍當總西事吾西撫軍當總東事

令

向化手令

蜀將孟達率眾降武都氏王
率種人內附王自手筆作令

吾前遣使宣國威靈而達即來吾惟春秋褒儀父即封

拜達使還領新城太守近復有扶老携幼首向王化者
吾聞夙沙之民自縛其君以歸神農幽國之衆襁負其
子而入豐鎬斯豈驅略迫脅之所致哉乃風化動其情
而仁義感其衷歡心內發使之然也以此而推西南將
萬里無外權備將與誰守死乎

答許芝上代漢圖讖令

昔周文三分天下有其二以服事殷仲尼歎其至德公
旦履天子之籍聽天下之斷終然復子明辟書美其人

吾雖德不及二聖敢忘高山景行之義哉若夫唐堯舜禹之蹟皆以聖質茂德處之故能上和靈祇下寧萬姓流稱今日今吾德至薄也人至鄙也遭遇際會幸承先王餘業恩未被四海澤未及天下雖傾倉竭府以振魏國百姓猶寒者未盡煖饑者未盡飽夙夜憂懼弗敢遑寧庶欲保全髮齒長守今日以沒於地以全魏國下見先王以塞負荷之責望狹志局守此而已雖屢蒙祥瑞當之戰惶五色無主若芝之言宣所聞乎心慄手悼書不

成字辭不宣口吾問作詩曰喪亂悠悠過紀白骨縱橫
萬里哀哀下民靡恃吾將佐時整理復子明辟致仕庶
欲守此辭以自終卒不虛言也宜宣示遠近使昭赤心

答辛毗等令

下四方以明孤欵心是也至於覽餘辭宣余所謂哉寧
所堪哉諸卿指論未若孤自料之審也夫虛談謬稱鄙
薄所弗當也且聞比來東征經郡縣歷屯田百姓面有
饑色衣或裋褐不完皐皆在孤是以上慙衆瑞下愧士

民由斯言之德尚未堪偏王何言帝者也宜止息此議
無重吾不德使逝之後不愧後之君子

答司馬懿等令

世之所不足者道義也所有餘者苟妄也常人之性賤
所不足貴所有餘故曰不患無位患所以立孤雖寡德
庶自免於常人之貴夫石可破而不可奪堅丹可磨而
不可奪赤丹石微物尚保斯質況吾托士人之末列曾
受教於君子哉且於陵仲子以仁為富柏成子高以義

為貴鮑焦感子貢之言棄其蔬而槁死薪者譏季札失
辭皆委重而弗視吾獨何人昔周武大聖也使叔旦盟
膠鬲於四內使召公約微子於共頭故伯夷叔齊相與
笑之曰昔神農氏之有天下不以人之壞自成不以人
之卑自高以為周之伐殷以恭也吾德非周武而義慙
夷齊庶欲遠苟妄之失道立丹石之不奪邁於陵之所
富蹈相成之所貴執鮑焦之貞至遵薪者之清節故曰
三軍可奪帥匹夫不可奪志吾之斯志豈可奪哉

答劉廙劉煜等令

犁牛之駁似虎莠之幼似禾事有似是而非者今日是已覩斯言事良重吾不德于是尚書僕射宣告官寮咸使聞知

讓禪令

當奉還璽綬為讓章吾豈奉此詔承此貺邪昔堯讓天下與許由子州支甫舜亦讓于善卷石戶之農非人無擇或退而耕潁之陽或辭以幽憂之疾或逵入山林莫

知其處或攜子入海終身不反或以為辱自投深淵且
顏歆懼太樸之不完守知足之明分王子搜樂丹穴之
潛處被重而不出柳下惠不以三公之貴易其介曾參
不以晉楚之富易其仁斯九士者咸高節而尚義輕富
而賤貴故書名千載於今稱焉求仁得仁仁豈在遠孤
獨何為不如哉義有蹈東海而逝不奉漢朝之詔也亟
為上章還璽綬宣之天下使咸聞焉

讓禪第二令

昔柏成子高辭夏禹而匿埜顏闔辭魯幣而遠跡夫以王者之重諸侯之貴而二子忽之何則其節高也故列士狗榮名義夫高貞介雖蔬食瓢飲樂在其中是以仲尼師王駘而子產嘉申徒今諸卿皆孤股肱腹心足以明孤而今咸若斯則諸卿遊於形骸之內而孤求為形骸之外其不相知未足多怪亟為上章還璽授勿復紛紛也

讓禪第三令

夫古聖王之治也至德合乾坤惠澤均造化禮教優
乎昆蟲仁恩洽乎草木日月所照戴天履地含氣有生
之類靡不被服清風沐浴玄德是以金革不起苛慝不
作風雨應節禎祥觸類而見今百姓寒者未煖饑者未
飽鰥者未室寡者未嫁權備尚存未可舞以干戚方將
整以齊斧戎役未息於外士民未安于內耳未聞康哉
之歌目未覩擊壤之戲嬰兒未可托於高巢餘糧未可
以宿於田畝人事未備至於此也夜未曜景星治未通真

人河未出良馬山未出象車冀莢未植階庭萐莆未生
庖厨王母未獻白環渠搜未見珍裘靈瑞未效又如彼
也昔東尸季子容成大庭軒轅赫胥之君咸得以此就
功勒名今諸卿獨不可少假孤精心竭慮以和天人以
格至理使彼衆事備羣瑞效然後安乃議此乎何遽相
愧相迫之如是也連為讓章上還璽綬無重吾不德也

答劉廙等令

天下重器王者正統以聖德當之猶有懼心吾何人哉

且公卿未至乏主斯豈小事且宜以待固讓之後乃當更議其可耳

答蘇林等令

凡斯皆宜聖德故曰苟非其人道不虛行天瑞雖彰須德而光吾德薄之人胡足以當之今讓冀見聽許外內咸使聞知

答華歆等令

以德則孤不足以時則戎虜未滅若以羣賢之靈得保

首領終君魏國於孤足矣若孤者胡足以辱四海至乎
天瑞人事皆先王聖德遺慶孤何有焉是以未敢聞命

又答相國歆等令

昔者大舜飯糗茹草將終身焉斯則孤之前志也及至
承堯禪被珍裘妻二女若固有之斯則順天命也羣公
卿士誠以天命不可拒民望不可違孤亦曷以辭焉

薄稅令

關津所以通商旅池苑所以禦災荒設禁重稅非所以

便民其除池藥之禁輕關津之稅皆復什一

復樵租稅令

先王皆樂其所生禮不忘其本樵霸王之邦真人本出其復樵租稅二年

以鄭稱為武德傳令

龍淵太阿出昆吾之金和氏之璧由井里之田礪之以砥礪錯之以他山故能致連城之價為命世之寶學亦人之砥礪也稱篤學大儒勉以經學輔侯宜旦夕入侍

曜明其志

廣詢令

軒轅有明臺之議放勛有衢室之問皆所以廣詢於下也百官有司其務以職盡規諫將率陳軍法朝士明制度牧守申政事縉紳考六藝吾將兼覽焉

問雍州刺史張既令

蘇則為金城太守西平麴演叛則勒兵討之演乞降文帝時襲王位令問既既答之加則護羌校尉賜爵關內侯後演復結旁郡為亂則誘斬之

試守金城太守蘇則既有綏民平夷之功聞又出軍西
定湟中為河西作聲勢吾甚嘉之則之功效為可加爵
邑未邪爵重事故以問卿密白意且勿宣露也

拜毛玠等子男為郎中令

下並元年

故尚書僕射毛玠奉常王修涼茂郎中令袁渙少府謝
真萬潛中尉徐奕國淵等皆忠直在朝履蹈仁義並早
即世而子孫陵遲惻然愍之其皆拜子男為郎中

收歛戰亡士卒令

諸將征伐士卒死亡者或未收歛吾甚哀之其告郡國
給槨殯殮歛送致其家官為設祭

策

追封鄧公策

惟黃初二年八月丙午皇帝曰咨爾鄧哀侯冲昔皇天鍾
美於爾躬俾聰哲之才成於弱年當永享顯祚克成厥
終如何不祿早世天昏朕承天序享有四海並建親親
以藩王室惟爾不逮斯榮且葬禮未備追悼之懷愴然

攸傷今遷葬于高陵使使持節兼謁者僕射郎中陳承
追賜號曰鄧公祠以大牢魂而有靈休茲寵榮

諡龐德策

昔先軫喪元王蠋絕脰隕身徇節前代美之惟侯式昭
果毅蹈難成名聲溢當時義高在昔寡人愍焉諡曰壯
侯

策孫權九錫文

蓋聖王之法以德設爵以功制祿勞大者祿厚德盛者

禮豐故叔旦有夾輔之勲太公有鷹揚之功並啟土宇
并受備物所以表章元功殊異賢哲也近漢高祖受命
之初分裂膏腴以王八姓斯則前世之懿事後王之元
龜也朕以不德承運革命君臨萬國秉統天機思齊先
代坐而待旦惟君天資忠亮命世作佐深覩歷數達見
廢興遠遣行人浮於潛漢望風影附抗疏稱藩兼納纖
絺南方之貢普遣諸將來還本朝忠肅內發欵誠外昭
信著金石義蓋山河朕甚嘉焉今封君為吳王使使持

節太常高平侯貞授君璽綬策書金虎符第一至第五
左竹使符第一至第十以大將軍使持節督交州領荆
州牧事錫君青土苴以白茅對揚朕命以尹東夏其上
故驃騎將軍南昌侯印綬符策今又加君九錫其敬聽
後命以君綏安東南綱紀江外民夷安業無或攜貳是
用錫君大輅戎輅各一玄牡二駟君務財勸農倉庫盈
積是用錫君衮冕之服赤舄副焉君化民以德禮教興
行是用錫君軒縣之樂君宣導休風懷柔百越是用錫

君朱戶以居君運其才謀官方任賢是用錫君納陞以
登君忠勇並奮清除姦慝是用錫君虎賁之士百人君
振威陵邁宣力荆南梟滅凶醜臯人斯得是用錫君鉞
鉞各一君文和於內武信於外是用錫君彤弓一彤矢
百旅弓十旅矢千君以忠肅為基恭勤為德是用錫
君鉅鬯一卣圭瓚副焉欽哉敬敷訓典以服朕命以勗
相我國家永終爾顯烈

冊孫登為東中郎封侯策

蓋河洛寫天意符讖述聖心昭晰著明與天談也故易
曰河出圖洛出書聖人則之孫將軍歸心國朝忠亮之
節同功佐命而其子當為魏將軍著在圖讖猶漢光武
受命李氏為輔王梁孫咸並見符緯也斯乃皇天啓祐
大魏永令孫氏仍世為佐其以登為東中郎將封縣侯
萬戶昔周嘉公旦祚流七胤漢禮蕭何一門十侯今孫
將軍亦當如斯若夫長平之榮安豐之寵方斯茂如

教

答卞蘭教

賦者言事類之因附也。頌者美盛德之形容也。故作者
不虛其辭受者必當其實。蘭此賦宣吾實哉。昔吾丘壽
王一陳寶鼎。何武等徒以歌頌猶受金帛之賜。蘭事雖
不諒義足嘉也。今賜牛一頭。

表

讓禪表

皇帝陛下奉被今月乙卯璽書伏聽冊命五內驚震精

爽散越不知所處臣前上還相位退守藩國聖恩聽許
臣雖無古人量德度身自定之志保已存性實其私願
不寤陛下猥損過謬之命發不世之詔以加無德之臣
且聞堯禪重華舉其克諧之德舜授文命采其齊聖之
美猶下咨四嶽上觀璿璣今臣德非虞夏行非二君而
承厯數之諮應選授之命內自揆撫無德以稱且許由
匹夫猶拒帝位善卷布衣而逆虞詔臣雖鄙蔽敢忘守
節以當大命不勝至願謹拜章陳情使行相國永壽少

府糞土臣毛宗奏并上璽綬

讓禪第二表

奉今月戊戌璽書重被聖命伏聽冊告肝膽戰悸不知所措天下神器禪代重事故堯將禪舜納于大麓舜之命禹玄圭告功烈風不迷九州攸平詢事考言然後乃命而猶執謙讓于德不嗣況臣頑固質非二聖乃應天統受終明詔敢守微節歸志箕山不勝大願謹拜表陳情使并奉上璽綬

讓禪第三表

臣聞舜有賓於四門之勲乃受禪於陶唐禹有存國七百之功乃承祿於有虞臣以蒙蔽德非二聖猥當天統不敢聞命敢屢抗疏略陳私願庶章通紫庭得全微節情達宸極永守本志而音重複銜命申制詔臣臣實戰惕不發璽書而音迫于嚴詔不敢復命願陛下馳傳騁驛召音還臺不勝至誠

書

與吳質書

質為朝歌長遼元城令太祖西
征太子南在孟津小城與質書

五月二十八日丕白李重無恙塗路雖局官守有限願
言之懷良不可任足下所治僻左書問致簡益用增勞
每念昔日南皮之游誠不可忘既妙思六經逍遙百氏
彈棊間設終以六博高談娛心哀箏順耳馳騫北場旅
食南館浮甘瓜於清泉沈朱李於寒水白日既匿繼以
朗月同乘並載以游後園興輪徐動賓從無聲清風夜

起悲茹微吟樂往哀來愴然傷懷余顧而言斯樂難常
足下之徒咸以為然今果分別各在一方元瑜長逝化
為異物每一念至何時可言方今蕤賓紀時景風扇物
天意和暖衆果具繁時駕而遊北遵河曲從者鳴笳以
啓路文學託乘於後車節同時異物是人非我勞如何
今遣騎到鄴故使枉道相過行矣自愛不白

又與吳質書

魏志云阮瑀以十七歲卒徐幹陳琳應瑒劉楨以二十二年卒質時為元城令太子與書

二月三日丕白歲月易得別來行復四年三年不見東山猶歎其遠况又過之思何可支雖書疏往返未足解其其勞結昔年疾疫親故多離其災徐陳應劉一時俱逝痛可言邪昔日游處行則連輿止則接席何曾須臾相失每至觴酌流行絲竹並奏酒酣耳熱仰而賦詩當此之時忽然不自知樂也謂百年已分長共相保何圖數年之間零落略盡言之傷心頃撰其遺文都為一集觀其姓名已為鬼錄追思昔遊猶在心目而此諸子化為

冀瓌可復道哉觀古今文人類皆不護細行鮮能以名
節自立而偉長獨懷文抱質恬淡寡欲有其山之志可
謂彬彬君子矣著中論二十餘篇成一家之言辭義典
雅足傳於後此子為不朽矣德璉常裴然有述作意其
才學足以著書美志不遂良可痛息間者厯覽諸子之
文對之投淚既痛逝者行自念也孔璋章表殊健微為
繁富公幹有逸氣但未遒耳至其五言詩之善者妙絕時人
元瑜書記翩翩致足樂也仲宣獨自善於辭賦惜其體弱

不足起其文至於所善古人無以遠過也昔伯牙絕絃
於鍾期仲尼覆醢於子路愍知音之難遇傷門人之莫
逮也諸子但為未及古人自一時之僞也今之存者已不
逮矣後生可畏來者難誣然吾與足下不及見也年行
已長大所懷萬端時有所慮至乃通夕不瞑志意何時復類
昔日已成老翁但未白頭耳光武言年已三十餘在軍十
歲所更非一吾德雖不及年與之齊以犬羊之質服虎
豹之文無衆星之明假日月之光動見瞻觀何時易邪

恐永不復得為昔日遊也少壯真當努力年一過往何
可攀援古人思秉燭夜游良有以也頃何以自娛頗復
有所造述否東望於邑裁書敘心丕白

又與吳質書

初曹真曹休與質等俱在渤海游處及太子
即王佐休真以宗親並受封爵出為列將而
質故為長史王顧質有
望故稱二人以慰之

南皮之游存者三人烈祖龍飛或將或侯今惟吾子棲
遲下仕從我游處獨不及門鉗罄壘恥能無懷愧路不

云遠今復相聞

與鍾繇謝王琬書

太祖征漢中太子在孟津聞繇有王琬密使臨淄侯因人說之繇遂送馬太子與繇書

丕白良玉比德君子珪璋見美詩人晉之垂棘魯之璠
璣宋之結綠楚之和璞價越萬金貴重都城有稱疇昔
流聲將來是以垂棘出晉虞號雙禽和璧入秦相如抗
節竊見玉書稱美玉白如截肪黑譬純漆赤擬雞冠黃
侔蒸栗側聞斯語未覩厥狀雖德非君子義無詩人高

山景行私所慕仰然四寶邈焉已遠秦漢未聞有良比也求之曠年不遇厥真私願不果饑渴未副近日南陽宗惠叔稱君侯昔有美玦聞之驚喜笑與抃會當自白書恐傳言未審是以令舍弟子建因荀仲茂時從容喻鄙旨乃不忽遺厚見周稱鄴騎既到寶玦初至捧匱跪發五內震駭繩窮匣開爛然滿目猥以蒙鄙之姿得覩希世之寶不煩一介之使不損連城之價既有秦昭章臺之觀而無蘭生詭奪之誑嘉矚益腆敢不欽承謹奉

賦一篇以讚揚麗質丕白

與鍾繇五熟釜書

繇為相國以五熟鼎範因太子鑄之釜成太子與繇書

昔有黃三鼎周之九寶咸以一體使調一味豈若斯釜
五味時芳蓋鼎之烹飪以饗上帝以養聖賢昭德祈福
莫斯之美故非大人莫之能造故非斯器莫宜盛德今
之嘉釜有逾茲美夫周之尸臣宋之考父衛之孔悝晉
之魏顆彼四臣者並以功德勒名鐘鼎今執事當亮大

魏以隆聖化堂堂之德於斯為盛誠太常之所宜銘彝
器之所宜勒故作斯銘勒之金口庶可贊揚洪美垂
之不朽

與鍾繇九日送菊書

歲往月來忽逢九月九日九為陽數而日月並應俗嘉
其名以為宜於長久故以享宴高會是月律中無射言
羣木百草無有射地而生惟芳菊紛然獨榮非夫含乾
坤之純和體芬芳之淑氣孰能如此故屈平悲冉冉之

將先思餐秋菊之落英輔體延年莫斯之貴謹奉一束
以助彭祖之術

與鍾繇書

荀閏字仲茂為太子文學掾時有甲乙疑論
閏與鍾繇王朗袁渙議各不同文帝與繇書

袁王國士更為唇齒荀閏勁悍往來銳師真君侯之勛
敵左右之深憂也

答鍾繇書

孫權稱臣太子書報繇
繇答書太子又答之

得報知喜南方至於荀公之清談孫權之斌媚執書喟
喟不能離手若權復黜當折以汝南許邵月旦之評權
優游二國俯仰荀許亦已足矣

答繁欽書

披書歡笑不能自勝竒才妙伎何其善也頃守官王孫
世有女曰瑣年始九歲夢與神通寤而悲吟哀聲激切
涉歷六載于今十五近者督將具以狀聞是日博延衆
賢遂奏名倡曲極數彈歡情未逞乃令從官引內世女

須臾而至厥狀甚美素顏玄髮皓齒丹唇詳而問之云
善歌舞於是提袂徐進揚蛾微眇芳聲清激逸足橫集
然後修容飾粧改曲變度斯可謂聲協鐘石氣應風律
今之妙舞莫巧於絳樹清歌莫激於宋牼豈能上亂靈
祗下變庶特漂悠風雲橫厲無方若斯也哉固非車子
喉轉長吟所能逮也吾鍊色知聲雅應此選謹卜良日
納之閒房

周劉楨書

太子初賜楨廓落帶其後師死
欲借取為像因書咽楨楨答之

夫物因人為貴故在賤者之子不御至尊之側今雖取
之勿嫌其不反也

答友人書

御覽作答劉先主然意
義絕不相貫姑闕姓名

獲累紙之命兼美之貺他既備善雙鈎尤妙前後之惠
非賢兄之貢則執事之貽也來若川流聚成山積其充
匱筭頓府藏者固已無數矣

與吳監書

中國珍果甚多且復為說蒲萄當其朱夏涉秋尚有餘暑醉酒宿醒掩露而食甘而不餽脆而不酸冷而不寒味長汁多除煩解倦又釀以為酒甘於麴蘖善醉而易醒道之固以流羨咽嗑況親食之邪南方有橘酢正裂人牙時有甜耳即遠方之果寧有匹者乎

與羣臣論蜀錦書

前後每得蜀錦殊不相比適可訝而鮮卑尚復不愛也自吾所織如意虎頭連壁錦亦有金薄蜀薄來至洛邑

皆下惡是為下工之物皆有虛名

與羣臣論被服書

三世長者知被服五世長者知飲食此言被服飲食難曉也夫珍玩必中國夏則縑總綃總其白如雪冬則羅綺縠衣疊鮮文未聞衣布服葛也

與朝臣論杭稻書

江表惟長沙名有好米何得比新城杭稻邪上風炊之五里聞香

報崔琰書

昨奉嘉命惠示雅數欲使燔翳捐褶翳已壞矣褶亦去焉後有此比蒙復誨諸

與曹洪書

今魯罪兼苗桀惡稔厲莽縱使宋翟妙機械之巧田單騁奔牛之誑孫吳勒八陣之變猶無益也

與王朗書

帝初在東宮疫癘大起時人雖傷帝深感歎與大理王朗書故論撰所著典論詩賦百餘

篇集諸儒於肅城門內
講論大義侃侃無倦

人生有七尺之形死為一棺之土惟立德揚名可以不
朽其次莫如著篇籍疫癘數起士人雕落余獨何人能
全其壽

又

宋仲子之子與魏諷謀
反伏誅太子答朗書

昔石厚與州吁游父碯知其與亂韓子昵田蘇穆子知
其好仁故君子游必有方居必就士誠有以也嗟乎宋

忠無石子先識之明老罹此禍今雖欲願行減親之誅
立純臣之節尚可得邪

又

孫權重遣使稱臣奉貢明珠百筐黃金千鎰馴象二頭
或牝或牡擾禽鸚鵡其他珍玩盈舟溢航千類萬品

又

丕白不愛江漢之珠而愛巴蜀之鈎此言難得之貴寶
不若易有之賤物

又

蚤虱雖細慮於安寢鼯鼠至微猶毀郊牛也

與劉曄書

劉生帽裁兩段製微不長有似里父之服今帽所當著

與諸將書

劉備既孤老智窮勢極正使欲與死爭則諸將軍便當就穴中掎取之爾

報吳王孫權書

權上書說劉備支黨四萬人馬二千匹出
秭歸請往搆撲以克捷為效帝報之

昔隗囂之弊禍發枸邑子陽之禽變起扞關將軍其亢
厲威武勉蹈奇功以稱吾意

又報孫權書

前使于禁郭及夫所道吾織驪馬本欲使禁自致之念
將軍儻欲速得今故以付徐奉往此二馬朕之常所自
乘甚調良善走數萬匹之極選者乘之真可樂也中國
雖饒馬其知名絕足亦時有之耳

又

權以使聘親具上破備獲印綬及首級所得
土地并表將吏功勤宜加爵賞文帝報使致
颶子來明光鐘駢馬又以素書
所作典論及詩賦與權詔答之

老虜邊窟越險深入曠日持久內迫罷弊外困智力故
見身於雞頭分兵擬西陵其計不過謂可轉是前迹以
搖動江東根未著地摧折其支雖未剗備五藏使身首
分離其所降誅亦足使虜部衆兇懼昔吳漢先燒荊門
後發夷陵而子陽無所逃其死來歙始襲略陽文叔喜

之而知隗囂無所施其巧今討此虜正似其事將軍勉
建方略務全獨克

又報孫權書

權外託事魏而誠心不款魏遣侍中辛毗尚
書桓階往與盟誓并徵任子登辭讓不受魏
乃命曹休等數道攻吳時揚越蠻夷多未
平復內難未弭權卑辭上書求自解厲若必
不見置當奉還土地
寄命交州帝報之

君生於擾攘之際本有從橫之志降身奉國以享茲祚
自君策名已來貢獻盈路討備之功國朝仰成埋而掘

之古人之所恥朕之與君大義已定豈樂勞師遠臨江
漢廊廟之議王者所不得專三公上君過失皆有本末
朕以不明雖有曾母投杼之疑猶冀言者不信以為國
福故先遣使者犒勞又遣尚書侍中踐修前言以定任
子君遂設辭不欲使進議者怪之又前都尉浩周勸君
遣子乃實朝臣交謀以此卜君君果有辭外引隗囂遣
子不終內喻竇融守忠而已世殊時異人各有心浩周
之還口陳指麾益令議者發明衆嫌終始之本無所據

杖故遂俛仰從羣臣議今省上事款誠深至心用慨然
悽愴動容即日下詔勅諸軍但深溝高壘不得妄進若
君必效忠節以解疑議登身朝到夕召其還此言之誠
有如大江

與孟達書

延康元年達率部曲四十餘家歸魏時文帝
初即王位既宿知有達聞其來甚悅逆與達
書達至拜散騎常侍
領新城太守後反誅

近日有命未足達旨何者昔伊摯背商而歸周百里去

虞而入秦樂毅感鵠夷以蟬蛻王遵識逆順以去就皆
審廢興之符效知成敗之必然故丹青畫其形容良史
載其功勲聞卿姿度純茂器量優絕當聘能明時收名
傳記今者翻然濯鱗清流甚相嘉樂虛心西望依依若
舊下筆屬辭歡心從之昔虞卿入趙再見取相陳平就
漢一覲參乘孤今於卿情過於往故致所御馬物以昭
忠愛

又與孟達書

今者海內清定萬里一統三垂無邊塵之警中夏無狗
吠之虞以是弛罔濶禁與世無疑保官空虛初無資任
卿來相就當明孤意慎勿令家人續紛道路以親駭疎
也若卿欲來相見且當先安部曲有所保固然後徐徐
輕騎來東

報吳王孫權書

知已送擇見船最大樟林者六艘受五百石從沔水送
付樊口

又

今因趙咨致文馬一匹白氊子裘一領

送劍書

僕有劍一枚明珠標首藍玉飾靶用給左右以除妖氛

序

典論自序

初平之元董卓殺主鳩后蕩覆王室是時四海既困中
平之政兼惡卓之凶逆家家思亂人人自危山東牧守

咸以春秋之義衛人討州吁于濮言人人皆得討賊於
是大興義兵名豪大俠富室強族飄揚雲會萬里相赴
充豫之師戰於滎陽河內之甲軍于孟津卓遂遷大駕
西都長安而山東大者連郡國中者嬰城邑小者聚阡
陌以還相吞併會黃巾盛於海嶽山寇暴於并冀乘勝
轉攻席卷而南鄉邑望烟而奔城郭覩塵而潰百姓死
亡暴骨如莽予時年五歲上以世方擾亂教予學射六
歲而知射又教余騎馬八歲而知騎射矣以時之多故

每征余常從建安初上南征荊州至宛張繡降旬日而
反亡兄孝廉子修從兄安民遇害時余年十歲乘馬得
脫夫文武之道各隨時而用生于中平之季長于戎旅
之間是以少好弓馬于今不衰逐禽輒十里馳射常百
步日多體健心每不厭建安十年始定冀州滅貊貢良
弓燕代獻名馬時歲之暮春勾芒司節和風扇物弓屎
手柔草淺獸肥與族兄子丹獵于鄴西終日手獲麋鹿
九雉兔三十後軍南征次曲蠡尚書令荀彧奉使犒軍

見余談論之末或言聞君善左右射此實難能余言執事未覩夫項發口縱俯馬蹄而仰月支也或喜笑曰乃爾余曰埒有常徑的有常所雖每發輒中非至妙也若馳平原赴豐草要狡獸截輕禽使弓不虛彎所中必洞斯則妙矣時軍謀祭酒張京在坐顧或拊手曰善予又學擊劍閱師多矣四方之法各異唯京師為善桓靈之間有虎賁王越善斯術稱於京師河南史阿言昔與越遊具得其法余從阿學之精熟嘗與平虜將軍劉勲奮威

將軍鄧展等共飲宿聞展善有手臂曉五兵又稱其能
空手入白刃余與論劔良久謂言將軍法非也余願嘗
好之又得善術因求與余對時酒酣耳熱方食竿蔗便
以為杖下殿數交三中其臂左右大笑展意不平求更
為之余言吾法急屬難相中面故齊臂耳展言願復一
交余知其欲突以取交中也因偽深進展果尋前余却
脚勦正截其額坐中驚視余還坐笑曰昔陽慶使淳于
意去其故方更授以祕術今余亦願鄧將軍捐棄故伎

更受要道也一坐盡歡夫事不可自謂已長余少曉持
複自謂無對俗名雙戟為坐鐵室鑲楯為蔽木戶後從
陳國素敏學以單攻複每為若神對家不知所出告曰
若逢敏於狹路真決耳余於他戲弄之事少所喜唯彈
碁略盡其巧少為之賦昔京師先工有馬合鄉侯東方
安世張公子常恨不得與彼數子者對上雅好詩書文
籍雖在軍旅手不釋卷每每定省從容常言人少好學
則思專長則善忘長大而能勤學者唯吾與袁伯業耳

余是以少誦詩論及長而備歷五經四部史漢諸子百家之言靡不畢覽

繁欽集序

上西征余守譙繁欽從時薛訪車子能喉嚨與茹同音欽戕還與余盛歡之雖過其實而其文甚麗

陳琳集序

上平定漢中族父都護還書與余盛稱彼方土地形勢觀其辭如陳琳所敘為也

建安諸序

維建安二十四年二月丙午魏太子丕造刀三其二曰
含章彩似丹霞 又曰造百辟寶劍三其二曰流彩虹
李尤字伯宗少有文章賈逵薦尤有相如揚雄之風拜
蘭臺令史與劉楨等共撰漢記

王粲長於詞賦陳琳阮瑀之章表書記今之俊也

建安二十四年二月壬午魏太子丕造百辟寶劍長四
尺二寸選茲良金令彼國工精而鍊之至於百辟淬以

清漳礪以礪諸光似流星名曰飛景

余好擊劍命彼國工以為寶器飾以文玉表以通犀

余好擊劍善以短乘長精而鍊之其始成也五色駭鑪

巨索自鼓雲物髣髴飛鳥翔舞

昔周魯寶雍狐之戟屈盧之矛孤父之戈徐氏匕首凡
斯皆上世名器君子雖有文事必有武備矣

魏太子造百辟匕首其三理似堅冰名曰清剛其二
曜似朝日名曰揚文其三狀似龍文名曰龍鱗

昔者周魯寶赤刀孟勞

丕造百辟寶刀其一文似靈龜名曰靈寶其二彩似丹霞名曰含章其三鋒似崩霜刀身劒缺名曰素質又作露陌刀一名龍鱗

酒以成禮過則敗德孝靈之末朝政墮廢官司並酒于酒貴戚尤甚流俗沈荒故作酒誨以戒

孝靈帝末羣官百司並酒于酒斗酒至千錢

論

典論論文

文人相輕自古而然傳毅之於班固伯仲之間耳而固小之與弟超書曰武仲以能屬文為蘭臺令史下筆不能自休夫人善於自見而文非一體鮮能備善是以各以所長相輕所短里語曰家有敝帚享之千金斯不自見之患也今之文人魯國孔融文舉廣陵陳琳孔璋山陽王粲仲宣北海徐幹偉長陳留阮瑀元瑜汝南應瑒德璉東平劉楨公幹斯七子者於學無所遺於辭無所

假咸以自騁驥駉於千里仰齊足而並馳以此相服亦良難矣蓋君子審己以度人故能免於斯累而作論文王粲長於辭賦徐幹時有齊氣然粲之匹也如粲之初征登樓槐賦征思幹之玄猿漏卮圓扇橘賦雖張蔡不過也然於他文未能稱是琳瑯之章表書記今之儔也應瑒和而不壯劉楨壯而不密孔融體氣高妙有過人者然不能持論理不勝辭至於雜以嘲戲及其所善楊班儔也常人貴遠賤近向聲背實又患闇於自見謂已

為賢夫文本同而未異蓋奏議宜雅書論宜理銘誄尚
實詩賦欲麗此四科不同故能之者偏也唯通才能備
其體文以氣為主氣之清濁有體不可力彊而致譬諸
音樂曲度雖均節奏同檢至於引氣不齊巧拙有素雖
在父兄不能以遺子弟蓋文章經國之大業不朽之盛
事年壽有時而盡榮樂止乎其身二者必至之常期未
若文章之無窮是以古之作者寄身於翰墨見意於篇
籍不假良史之辭不託飛馳之勢而聲名自傳於後故

西伯幽而演易周旦顯而制禮不以隱約而不務不以
康樂而加思夫然則古人賤尺璧而重寸陰懼乎時之
過已而人多不彊力貧賤則懾於饑寒富貴流於逸樂
遂營目前之務而遺千載之功日月逝於上體貌衰於
下忽然與萬物遷化斯亦志士大痛也融等已逝唯幹
著論成一家言

典論論方術

潁川郤儉能辟穀餌伏苓甘陵甘始亦善行氣老有少

容廬江左慈知補導之術並為軍吏初儉之至市伏苓
價暴數倍議郎安平李覃學其辟穀餐伏苓飲寒水中
泄利殆至隕命後始來衆人無不鵠視狼顧呼吸吐納
軍謀祭酒弘農董芬為之過差氣閉不通良久乃蘇左
慈到又競受其補導之術至寺人嚴峻往從問受闔豎
真無事於斯術也人之逐聲乃至於是光和中北海王
和平亦好道術自以當僊濟南孫邕少事之從至京師
會和平病死邕因葬之東陶有書百餘卷樂數囊悉以

送之後弟子夏榮言其尸解邕至今恨不取其寶書僊藥劉向惑於鴻寶之說君游眩於子政之言古今愚謬
豈惟一人哉

周成漢昭論

或方周成王於漢昭帝帝高成而下昭余以為周成王
體上聖之休氣稟賢妣之胎誨周召為保傅呂尚為太
師口能言則行人稱辭足能履則相者導儀目厭威容
之美耳飽仁義之聲所謂沈清玄流而沐浴清風者矣

猶有咎悔。矜二叔之謗。使周公東遷。皇天赫怒。顯明厥咎。猶啓諸金。滕稽諸國史。然後乃悟。不亮周公之聖德。而信金滕之教言。豈不暗哉。夫孝昭父。非武王母。非邑姜養。惟蓋主相。則桀光體。不承聖化。不胎育。保無仁孝之質。佐無隆平之治。所謂生於深宮之中。長於婦人之手。然而德與性成。行與體并。年在二七。早智夙達。發燕書之詐。亮霍光之誠。豈將有啓金滕。信國史。而後乃悟哉。使夫昭成均年。而立易世。而化質臣。而治。換樂而歌。則

漢不獨少周不獨多也

漢文帝論

昔有苗不賓重華舞以干戚尉佗稱帝孝文撫以恩德
吳王不朝錫之几杖以撫其意而天下賴安能弘三章
之教愷悌之化欲使曩時累息之民得濶步高談無危
懼之心若賈誼之才敏籌畫國政特賢臣之器管晏之
姿豈若孝文大人之量哉

帝集諸儒於肅城門內講論
大義嘗嘉漢文寬仁玄默務

欲以德化民有賢聖之風時諸儒或以孝文雖
賢其通達國體不如賈誼帝由是著太宗論

漢武帝論

孝武帝承累世之遺業遇中國之殷阜府庫餘錢帛倉廩畜腐米因此有意平滅匈奴而廓清邊境矣故即位之初從王恢之書設馬邑之謀自元光以迄征和四十載之間征匈奴四十餘舉踰廣漠絕梓嶺封狼居胥禪姑嶧梁北河觀兵瀚海刈單于之旗勦闕氏之首探符離之窟掃五王之庭納休屠毘耶之附獲祭天金人之寶斬名王以十數馘首虜以萬計既窮追其敗亡又

摧破其積聚虜不暇於救死扶傷疲於孕重墮殞元封
初躬執武節告以天子自將懼以兩越之誅易彼符號
可為威震匈奴矣

交友論

夫陰陽交萬物成君臣交邦國治士庶交德行光同憂
樂共富貴而友道備矣易曰上下交而其志同繇此觀
之交乃人倫之本務王道之大義非特士友之志也白
虎通曰朋友之道有四近則正之遠則稱之樂則思之

患則死之揚子法言曰朋而不心面朋也友而不心面友也說苑曰魏文侯歎田子方曰自友方也君臣益親百姓益附吾是以知友士之功焉

議

田疇辭封議

昔遠教逃祿傳載其美所以激濁世勵貪夫賢於尸祿素餐之人也故可得而小不可得而毀至於田疇方斯近矣免官加刑於法為重

連珠

連珠三首

蓋聞琴瑟高張則哀彈發節士抗行則榮名至是以申
胥流音於南極蘇武揚聲於朔裔

蓋聞四節異氣以成歲君子殊道以成名故微子奔走
而顯比干剖心而榮

蓋聞駕蹇服御良樂咨嗟鉛刀剖截歐冶歎息故少師
幸而季梁懼宰嚭任而伍員憂

銘

露陌刀銘

於鑠良刀胡煉亶時譬諸麟角靡所任茲不逢不若永
世寶持利用衛身以威弗治

賜鍾繇五熟釜銘

於赫有魏作漢藩輔厥相惟鍾實幹心膺靖恭夙夜匪
遑安處百寮師師楷茲度矩

文

即位告天文

皇帝臣丕敢用玄牡昭告於皇皇后帝漢歷世二十有四踐年四百二十有六四海困窮三綱不立五緯錯行靈祥並見推術數者慮之古道咸以為天之歷數運終茲世凡諸嘉祥民神之意比昭有漢數終之極魏家受命之符漢主以神器宜授於臣憲章有虞致位於丕丕震畏天命雖休勿休羣公庶尹六事之人外及將士洎於蠻夷君長僉曰天命不可以辭拒神器不可以久曠

羣臣不可以無主萬機不可以無統丕祇承皇象敢不
欽承卜之守龜兆有大橫筮之三易兆有革兆謹擇元
日與羣寮登壇受帝璽綬告類于爾大神唯爾有神尚
饗永吉兆民之望祚于有魏世享

哀策文

武帝哀策文

痛神曜之幽潛哀鼎俎之虛置舒皇德而詠思遂膈臆
以泣事矧乃小子夙遭不造筑筑在疚嗚呼皇考產我

曷晚棄我曷早羣臣子輔奪我哀願猥抑奔墓俯就權
變卜葬既從大隧既通漫漫長夜窈窈玄宮有晦無明
曷有所窮鹵簿既整三官駢羅前驅建旗方相執戈棄
此宮庭陟彼山阿

誄

弔蒼舒誄

曹冲字蒼舒文帝之弟也少聰察岐嶷有成
人之智年十三病卒曹公哀甚為聘甄氏亡

女與合葬贈
騎都尉印綬

惟建安十有五年五月甲戌童子曹蒼舒卒嗚呼哀哉
乃作誄曰

於惟淑弟懿矣純良誕豐令質荷天之光既哲且仁爰
柔克剛彼德之容茲義肇行猗歟公子終然允臧宜逢
介祉以永無疆如何昊天彫斯俊英嗚呼哀哉惟人之
生忽若朝露役役百年亶亶行暮矧爾夙夭十三而忘
何辜於天景命不遂兼悲增傷佗倅失氣永思長懷哀
爾罔極貽爾良妃禭爾嘉服越以乙酉宅彼城隅增丘

我我寢廟渠渠姻媾雲會充路盈衢悠悠羣司岌岌其
車傾都蕩邑爰迄爾居魂而有靈庶可以娛嗚呼哀哉

制

終制

禮國君即位為柩存不忘亡也昔堯塋穀林通樹之禹
塋會稽農不易畝故葬於山林則合乎山林封樹之制
非上古也吾無取焉壽陵因山為體無為封樹無立寢
殿造園邑通神道夫葬也者藏也欲人之不得見也骨

無痛痒之知冢非棲神之宅禮不墓祭欲存亡之不黷也為棺槨足以朽骨衣衾足以朽肉而已故吾營此丘壙不食之地欲使易代之後不知其處無施葦炭無藏金銀銅鐵一以瓦器合古塗車芻靈之義棺但漆際會三過飯含無以珠玉無施珠襦玉匣諸愚俗所為也季孫以璆璠歛孔子厯級而救之譬之暴骸中原宋公厚葬君子謂華元樂莒不臣以為棄君於惡漢文帝之不發霸陵無求也光武之掘園陵封樹也霸陵之完功在

釋之原陵之掘罪在明帝是釋之忠以利君明帝愛以害親也忠臣孝子宜思仲尼丘明釋之言鑒華元樂莒明帝之戒存於所以安君定親使魂靈萬載無危斯則賢聖之忠孝矣自古及今未有不亡之國亦無不掘之墓也喪亂以來漢氏諸陵無不發掘至乃燒取玉匣金鏤骸骨并盡是焚如之刑豈不重痛哉禍由乎厚葬封樹桑霍為我戒不亦明乎其皇后及貴人以下不隨王之國者有終沒皆葬澗西前又以表其處矣蓋舜葬蒼

梧二妃不從延陵葬子遠在羸博魂而有靈無不之也
一澗之間不足為遠若違今詔妄有所變改造施吾為
戮尸地下戮而重戮死而重死臣子為蔑死君父不忠
不孝使死者有知將不福汝其以此詔藏之宗廟副在
尚書秘書三府

漢魏六朝百三家集卷二十四